



## **ONGI ETORRI BATXILERGORA**

Batxilergoa eskakizun-maila handiko ikasketa moldea da eta DBHren ondoan oso bestelakoa. Batxilergoa oinarritzkoa da ikaslearen prestakuntza orokor eta profesionalean eta horregatik gure arreta osoa merezi du. Nola nahi ere, uste izanez gero ikaslearen Batxilergorako prestakuntza-maila ahula dela, badira Batxilergora iristeko zehar-bideak ere, Lanbide Heziketako Erdi Mailako zikloak, adibidez. Ikasketa hauek egin eta gero berriro batxilergoa egitera etor daiteke edo Lanbide Heziketako Goi Mailako Ziklo bat ikasi.

Batxilergoa gainditzeko ikasi egin behar da, sufritzen ikasteko borondatea behar da eta ikasketa denbora eta ahalegina eskaini behar zaizkie. Ez dago beste biderik. Klaseetan adi egon, lanak egin eta azterketa-bezperan estudiatzea ez da nahikoa. Batxilergoan egunero-egunero heldu behar zaie jakintzagai guztiei.

Badira 1. ebaluazioaren ondoren desanimatu egiten diren ikasleak. Ikasketak bertan behera uztea ere pentsatzen dutenak. Ikasle horiei aurrera egiten lagundu egin behar zaie animoa emanaz: laguntza beharrean badira, bila dezatela. Ikasturtea berrantola dezatela, artean, 2. eta 3. ebaluazioak eta azkena ere falta direlako.

Ikasle guztiak ez dira askotan guk nahi genituzkeen bezain helduak eta ikasketetan Batxilergoraino iritsi badira ere, gurasoen eta etxekoan laguntza behar izaten dute.

Zenbaitetan Unibertsitatera iristeko batez besteko nota altu samarra eskatzen da. Jakitekoa da Batxilergoko Lehen zein Bigarren ikasturteko notek balio bera dutela. Horrek esan nahi du Batxilergoko Lehen ikasturteko lehen ebaluazioko notek Unibertsitatera eta Lanbide Heziketako Goi Mailako zikloetan sartzeko balio dutela.

Ikasle batzuek ez diete adore berarekin ekiten jakintzagai guztiei. Ez da ahaztu behar jakintzagai guzti-guztiak gainditu behar direla batxiler titulua lortzeko.

Eskolaz kanpoko jarduerak (musika, kirola...) ikasketekin bateratzeko modukoak izan behar dute. Oso komenigarria da lehentasunak argi izatea. Era berean, gero eta ikasle gehiagok ematen ditu orduak eta orduak bideo-jokoetan (PlayStation, ordenagailua...) edota sare-sozialetan. Jarduera horiei eskainitako denbora zaintzea komeni da.

Ikasleek adin honetan, egonezin emozionala, antsietatea eta bestelako aldaketak pairatzen dituzte. Horiek guztiek lan akademikoan eragina izan dezakete. Horregatik orain ere onarpena, onberatasuna, umore ona, komunikazioa eta maitasuna behar dituzte gazteek, aurreko urteetan bezala. Batxilergo garaian gazteek gurasoekiko lotura ahuldu eta erabakimena handiagotu egiten dute. Aldatu-behar hori guztia ez da kontraesanik eta jarrera zailik gabe izaten. Gazteak, lagunduko duten nagusiak behar ditu inguruan; haiengan konfidantza izatea galderak egiteko eta pentsaraziko dioten erabakiak hartzeko. Gazteek laxotasun handiagoa ere nahi izaten dute, eta ongi da ematea, aldi berean, baina, erantzukizuna ere hartzen dutelarik.

Egunero-egunero 8 orduko loa, jatorduak zaintzea eta ariketa fisikoa egitea osasungarri izateaz gainera, ikasturtea airoso gainditzeko lagungarri izango ditu ikasleak. Klaseetara joatea eta egunero-egunero ikastea oinarritzko-oinarritzkoak dira. Hau guztia arretaz zainduz Batxilergoa gainditzeko ez da horrenbestekoa. Laguntza, argibideren bat edo orientabidea nahi izanez gero, etorri gugana.

[orientazio@piobaroja.eus](mailto:orientazio@piobaroja.eus)